

Dodjela stipendija iz Fonda „Suada Dilberović“
30. 01. 2012.
OBRAĆANJE
Prof. dr. Faruk Čaklovica, rektor Univerziteta u Sarajevu

Poštovani dekani,
poštovani predstavnici akademske zajednice,
dragi studenti,

Univerzitet u Sarajevu već četvrtu godinu organizira ovu humanu manifestaciju na kojoj promovira Fond „Suada Dilberović“ i dodjeljuje stipendije socijalno ugroženim i izuzetno nadarenim studentima Univerziteta u Sarajevu.

Želja nam je da u ovom fondu, koji je jedinstven u svijetu, obezbijedimo sredstva za što je moguće veći broj studenata, imajući u vidu činjenicu da ne postoje budžetska sredstva za ove namjene, te da istovremeno svake godine imamo sve veći broj prijavljenih studenata u kategoriji socijalno ugroženih.

Ova humana akcija koju vodi Univerzitet u Sarajevu predstavlja direktnu podršku i pomoć studentima u prevazilaženju složene socijalno-ekonomske situacije.

U ovom teškom periodu, kada država Bosna i Hercegovina još uvijek nije konstituisala državne nivoe vlasti, mi smo kao akademska zajednica uz puno umijeća i ljubavi obezbijedili vlastita sredstva za stipendiranje 188 studenata Sarajevskog univerziteta.

Obezbijedena finansijska sredstva smatramo uspjehom i podvigom kada je u pitanju stipendiranje studenata Univerziteta u Sarajevu i ponosni smo što je ova humana aktivnost postala tradicija naše akademske zajednice.

Također smo ponosni i na humanost naših studenata koji su pri upisu u akademsku 2011/2012. godinu uplatili znatna finansijska sredstva sa namjerom i željom da pomognu svojim kolegama.

Nadam se, dragi studenti, da ćete uz ovu jedinstvenu podršku svih fakulteta i akademija, instituta i centara Univerziteta u Sarajevu, SPUS-a, Vlade i Skupštine Kantona Sarajevo, cijenjenih donatora, prije svega prijatelja Univerziteta, uspješno završiti studij i da ćete biti dobri stručnjaci i čestiti građani Bosne i Hercegovine.

Čestitam studentima i hvala svima vama koji ste dio ove velike i jedinstvene humane akcije!

Hvala!